

# Finanziaziun da la tgira vegn reglada da nov

Il cussegl grond ha cumenzà cun la debatta davart la revisiun totala da la lescha per promover la tgira da personas malsaunas

DA MARTIN CABALZAR

■ **La finamira da la revisiun è da promover il tractament medicinal, la tgira sco era l'assistenza medicinala ambulanta e staziunara da personas malsaunas, da pazientas e pazients da lunga durada sco era da personas attemadas. Quai duai succeder conform il bassegn, en moda adeguada ed economica ed en la qualitad necessaria.**

Las mesiras concretas eran vegnidas postulas gia en il rapport davart la finanziaziun dals ospitals e da la tgira staziunara ed ambulanta en il chantun Grischun ch'il cussegl grond aveva approvà il zercladur 2016. Suenter ch'il sboz da la regenza ha chattà in resun positiv en la procedura da consultaziun ha la regenza profità da l'ocasiun da colliar la revisiun parziala materiala cun ina revisiun totala furmala.

## Missiva da la regenza

Ultra da quai preveda la revisiun actuala ina novaziun en il sectur da la finanziaziun dals custs da tgira e d'assistenza d'abitantas ed abitants da chasas da personas attempadas e da tgira che dovran extraordinariamain blera tgira e/u assistenza. Per questas personas duai la regenza vegnir autorisada da renconuscher supplementarmain als custs che ston vegnir mess a quint sin basa da la classificaziun SCRA ulteriurs custs da pensiun

Per pomover dimoras curtas per distgargiar las personas che assistan e tgeran lur confamigliars duai la regenza ultra da quai era pudair differenziar ils custs da pensiun renconuschids tenor ils dis da tgira per dimoras curtas cumprovads da las chasas da personas attempadas e da tgira. La finala duain era las contribu-

ziuns chantunales che vegnan reducidas, sch'i na vegn betg mess ad disposiziun il dumber da plazzas da scolaziun per professiuns dals fatgs da sanadad e socials fixà da la regenza, vegnir pajadas a quellas instituziuns che mettan a disposiziun daplì plazzas da scolaziun che pretendi. Uschia duain – tenor cusseglier guvernativ *Christian Rathgeb* – vegnir remuneradas instituziuns che sa stentan extraordinariamain en favur da la scolaziun.

## Posiziun da la cumissiun da sanadad e fatgs socials

Sco quai che la presidenta da la cumissiun da sanadad e fatgs socials *Erika Cahenzli-Philipp* (ps) ha accentuà en la debatta d'entrada propona la cumissiun d'approbar il project. Il project prevedia da realisar il rapport tractà dal cussegl grond en la sessiun da zercladur 2016 davart la finanziaziun dals opitals e da la tgira vegnì tramess en consultaziun sco revisiun parziala. Damai che la lescha davart la tgira da malsauns che deriva da l'onn 1979 saja vegnida revedida parzialmain bleras giadas fin oz hajan tant la sistemistica sco la legibladad logicamain pati. La cumissiun haja perquai renconuschì la necessitad d'ina revisiun totala furmala.

Enten tractar las singulas disposiziuns saja la cumissiun sa fatschentada intensivamain da l'entir relasch, ma ella saja sa restrenschida da far propostas da midadas materialas mo là nua che la procedura da consultaziun aveva proponì talas. In eventual ulteriur basegn d'agir en il senn material duai vegnir tractà pli tard en missivas separadas per revisiuns parzialas, ha punctuà Cahenzli-Philipp.

Per la cumissiun saja actualmain gist ed important ch'ils puncts da rapport da-



Deputada Erika Cahenzli e cusseglier guvernativ Christian Rathgeb han timunà la debatta davart la lescha da la tgira da malsauns.

FOTO O. ITEM

vart la finanziaziun dals ospitals e da la tgira conclusids dal cussegl grond posian vegnir realisads e che la lescha possa vegnir suttamessa il medem mument ad ina revisiun totala che resguarda er ina purificaziun furmala.

Per gronda part sustegna la cumissiun il sboz da la lescha, sco quai che plirs commembers èn s'exprimids en la debatta d'entrada. Mo la propsta da midar la lescha davart ils servetschs psichiatric dal Grischun ha procurà per ina divergenza d'opiniuns en la cumissiun. Ina gronda maiortad haja la finala pretendi da restar qua tier il dretg vertent.

Il cussegl grond ha conclusì d'entrar en materia e quai cun 103 cunter 0 vuschs.

## Da la debatta da detagl

En il rom da la debatta da detagl punctuescha *Claudia Märchy-Caduff* (pcd) Razén) la necessitad da porscher en il Grischun era furmas d'abitare per giuvenils ch'ins na possa betg plazzar en ina chasa da vigls u da tgira. Tenor cusseglier guvernativ Christian Rathgeb n'è quai betg mo in problem grischun, mabain naziunal. I dettia en l'enitra Svizra memia paucs plazz per plazzar uffants e giuvenils en la vischinanza da lur domicil. *Christine Bucher* (ps Cuir) è da l'avis ch'ins stoppia resguardar basegns regiunals differents tar las pussaivladads d'abitare accumpagnads. *Emil Müller* (pbd Sur Tasna) è da l'avis ch'ins stoppi pudair controllar meglier che las reservas per investiziuns vegnian

er applitgadas per quest intent. Sin fundament da las prescripziuns da lescha da las assicuranzas da malsauns examinescha la regenza periodicamain la glista da spitals che resguarda la medischina acuta, la psichiatria e la rehabilitaziun. Las prestaziuns dals singuls spitals vegnan fixadas en cunvegns da prestaziun. Las contribuziuns chantunales als spitals vegnan fixadas annualmain en il rom dal budget chantunal. Il medem vala era per las chasas da vegls e tgira. Il chantun fixescha quai ina cumpart maximala als custs da pensiun, d'accumpagnament e da tgira. Instituziuns che porschan pussaivladads da furmaziun vegnan remuneradas finanziarmain a donn e cust da quels che tralasan questa incumbensa.